

開放文學 – 神鬼仙俠 – 東遊記 七 仙丹起死回生

卻說先生知其徒之母已死，乃自思曰：“彼守我之屍而不終者，迫於母也。彼之母死而不克送者，累於我也。我不為之起死回生，彼將終身抱恨矣！”於是，手提鐵拐，肩背葫蘆，逕至楊家。只見楊子哀號哽噎，頓足捶胸，撫棺長恨，欲拔劍自刎。鐵拐進前故問曰：“死生有命，不可強求。人子事親，生盡孝，死盡忠，棺槨衣衾，卜之宅兆，哀戚送之足矣，何必以死繼之？”楊子言曰：“我因吾師神出華山，令吾守魄，約以遊魂七日不返，方可化之，及守至六日，適吾母以疾聞，勢不能待，竟化師魄而歸。及歸，而吾母已死。是內不能盡孝於母，外不能盡信於師，母必以我慢命為不孝，師必以我之失信為不忠。不孝不忠，眾人恥於當時，君子羞於後事。天地罪人，世間廢物，速死猶晚，何敢生焉？”言訖復欲同刎。先生持之曰：“忠孝在於立心，君心如此，則忠，所謂不忠不幸者，實大忠大孝也，吾因出遊，得異人傳授起死靈丹，必待善人方可援救。今子善人也，試與爾母服之，或能回生未可知也。”楊子聞言，急忙拜跪求藥。先生於葫蘆中取出一丸與之，以水調灌母口中。須臾，氣續臉紅，長嘆一聲而起，如素無病者。合家稽首拜謝先生，求其姓名。先生曰：“吾即汝師也。因汝化我屍，我附他形而起。又知汝母已死，恐必相怨於吾，故來相救耳。今聞汝言，吾子之用心不是過也，汝母今日回生，可就終養。”復以一丸遣楊子曰：“服此可以延年，且尚有會日也。”楊子再欲求問，先生忽化清風而去。楊子望空拜謝，服其丸，事母終老，尋李鐵拐舊處。二百年後，鐵拐引之同升。